锡庆里往事

唐家湾

2017年清晨, "万有全唐家湾小菜场"里, 喧闹中百味混杂。北方大厦对过个胡梯浪向, 已经人轧人。望下看, 摊连摊, 贩挨贩, 向南绵延三百余米, 大小弄堂数不胜数四通八达; 单讲胡梯上去个室内市场, 也堪称品种齐全, 物美价廉。



箇墳是大上海顶早个小菜场,没"之一"两字,建于1903年。而大约 莫100年前,替小菜场一般年纪个庄锡庆也来到了此地,见到了与现在相当个繁华。

庄锡庆指垃小菜场东首个空地,对伊个父亲讲:"就迭境,我房子造好,将来买小菜赛过霞飞路介便当。望东有白云观,朝南有惠中堂,走走侪弗到廿分钟。我天天去拜,仙人或者上帝总归会得保佑我生意吧!"

庄锡庆个父亲讲: "其他侪好,但不过伊拉讲斜桥南是坟墩。有眼近,风水弗大好吧?"

庄锡庆讲: "迭个有啥啦?讲近也有段路要走咪。人总有一天要翘辫子个,离坟近,我个子孙送我葬还省得遠咪。"

"侬隻小鬼头只有几岁啊?"庄父嘲嘲伊, "葛侬预备房子造啥样子?"

庄锡庆答: "必须是洋房,三层,顶少要十几间。我花園里要种一棵白玉兰,子子孙孙看到树,侪可以想起我。"

庄父继续嘲: "小鬼掼派头啊? 侬将来结之婚也只有两家头,要介许 多房间发痴?"

庄锡庆胸一挺,讲:"我要养大兒子、二兒子、三兒子……我每个兒子还要大孙子、二孙子、三孙子……我还怕房间弗够多唻——到辰光要伊拉一道送我葬!"

庄锡庆个房子后来就造好了,但伊並没葬垃上海,推测伊客死他乡。 垃拉箇个几十年里,庄家命运起起落落,历经富足殷实、生离死别、 骨肉失散、天各一方。单论其中一桩事体,侪未必稀奇。但上海个近 代历史中,有多少条"锡庆"里,每条"锡庆"里,侪有过一位"庄 锡庆"叹息过。箇个也作兴是阿拉上海人个公共记憶?

烟囱管

我出生于80年代,从记事起,就好奇洋房里个点滴事物。我经常问我母亲问题,而伊也自幼生活于此。从听到个一眼零碎个信息里,我纔了解到庄家个部分故事。庄锡庆本人,我並未见过。

我一直弗欢喜洋房个暗洞:从房子东面进来,过道狭窄,终年弗见太阳,漆黑阴冷,日里向走走也抖抖豁豁。

我问母亲: "上海人住房紧张,条件侪弗理想,我懂个。但为啥阿拉小区个暗洞要箇恁设计?"

伊答道: "箇幢房子一开始並弗是公房, 而是一个五金厂老板个花園 洋房。

"老板个名字叫庄锡庆。阿拉103号弄堂大门口有两个字,虽然畀人家用水泥存心涂过,但还是看得见印子:'锡庆里,1922年建',就是庄锡庆个名字。庄锡庆住进来埃歇,洋房弗比孙中山故居逊色,一等一个豪华。

"现在103号弄堂大门口个位置,本来是铁门,靠了旁边石头围墙,门一关,就是庄锡庆私人财产。按伊设想,洋房入口垃南面。大理石个臺阶,宽得来可容三个人平排走。拱形个大门,两边柱头,高头遮阳棚。拱门进来个胡梯,直通二楼客堂间,就是现在万伯伯屋里。



"之所以有得暗洞,是因为房子经历了两次历史事件。锡庆里垃原法租界内,以唐家湾为界,同时代还有英美等国个公共租界。1941年,太平洋战争爆发,东洋人拿法英美等国个人赶脱,一时上海滩盗贼横行。庄锡庆为保平安,拿洋房南面个门封脱,胡梯拆脱。入口开到东面,存心修成暗洞,让外人弗容易进得来。暗洞尽头,搭出临时木头胡梯,通二楼西面后厢房。日军投降以后,庄锡庆放之炮仗,拿南面个正门再修成替原先一样。伊是完美主义者,拿暗洞到底个临时胡梯拆脱了。

"到了五几年碰着公私合营,庄锡庆为躲避仇家,再拿南面个拱门胡梯拆脱,重新启用暗洞,再造临时胡梯。箇趟伊财力吃紧,所以工程质量介搭浆。"

我问: "庄锡庆屋里介好,一定是大老板咯? 伊是哪恁个人啊?"

母亲说: "我也没看见过伊,只认得伊两个囡兒。

"我小辰光跟了侬外公、外婆搬进箇幢房子。除脱阿拉,还有张阿姨跟大张姐姐、小张姐姐。张阿姨自家住垃马桶间隔壁朝东个小间,让大张姐姐睏垃前头西面箇间,小张姐姐睏垃东面最南间。其他房间侪已经畀锁脱空关了,包括一楼替三层楼所有个房间。

"妈妈小辰光替小张姐姐白相了最好。伊拉屋里有隻风琴,我经常去弹。伊书架高头侪是乐谱,里向头还夹了几张黑胶唱片,不过留声机坏脱放弗出声音。偶尔看到伊翻乐谱辰光,眼神有点异样,弗像小学生应该有个。

"张阿姨垃吉安路个厂里上班,后首来厂改成了小学,就是侬读个小学,原先埃面是法藏讲寺。张阿姨为之多赚两钿,畀张家两个姐姐吃牛肉,工作卖力,替领导要求做夜班。日里向,伊还要买小菜、汏衣裳、牛煤炉、烧饭。

"我从来就没看见过张阿姨拉先生,就问外公究竟。伊讲:'张阿姨没结过婚,老早是庄锡庆个佣人,比女主人小十多岁。庄锡庆是资本家,前两年去香港做生意了,两个小姑娘实际浪姓庄,是伊个囡兒。不过记牢:侬垃外头人面前千万只好叫伊拉张姐姐,否则要闯祸。'"

我问: "葛末庄锡庆两个囡兒我也没看到过呀。或者是囡兒个后代又改姓了, 所以我弗认得?"

母亲讲: "弗是。两个囡兒后首来侪出过事体。

小张姐姐没读初中,毕业以后就替社会接触了。伊欢喜带人到张阿姨替大小张姐姐屋里参观。有段辰光,伊专门带同一个哥哥转来,迭个哥哥比大张姐姐还大几岁。张阿姨好像弗大欢喜迭个哥哥,背后头讲伊是小流氓。之后,小张姐姐从夜到老晏转来,发展到夜不归宿,有一日出去之后就再无音讯,直到张阿姨过世!"

我问: "伊畀小流氓拐脱了?"

母亲答: "'小流氓'弗一定哪恁流氓。但我猜想,小流氓乱轧坏道,朋友个朋友个朋朋友里向有得拐子大流氓,就发生了悲剧。

"事体过脱第二年,大张姐姐五爱中学(原惠中学塾,后改为五爱中学,再后头改为李惠利中学,再再后头改为比乐中学)毕业。为了支援国家建设,去黑龙江接受贫下中农再教育了。走个箇日,12月份,张阿姨替大张姐姐早浪四点钟就出门了。张阿姨衣着单薄,拿厚衣裳侪畀了伊,还为伊烧了十斤熟牛肉,让伊带之路高头吃。大张姐姐大

包小包又背又拎,怪张阿姨畀伊物事忒多没必要,张阿姨弗停个关照啥个物事阿里隻包里寻。"

我问: "所以现在'大张姐姐'屋里住个陈家, '小张姐姐'屋里个孙家, 侪是伊拉跑脱以后搬进来个?"

母亲讲: "弗是。小张姐姐个房间原本是主人房,顶大。现在孙家屋里是拿伊房间一揦两个一半,另外一半是郑家。但是大张姐姐跑脱以后,最先搬进来个还弗是陈家,而是冯家,之后调畀陈家。同样道理,小张姐姐个房间一揦两以后,一半畀了赵家,之后调畀钱家、孙家;另外一半周家、吴家,最后到郑家。"

我问: "再后头, 阿拉个邻舍就陆续搬进来了?"

母亲讲: "对。几年后,底楼、三层楼侪畀住满,直到花園里也搭满棚棚,大家地方侪紧张。

"张阿姨隔壁个劳家,劳括币拉爸爸垃张家阿姨门口替伊自家门口当中,用砖头砌了灶头,劳括币拉爸爸一烧饭,就乌烟瘴气,张阿姨只好门一关,一家头迓进去弗敢响。"

我讲: "我晓得个, '大张姐姐'就是去插队落户了, 二舅舅二阿姨 侪去过。好像一般性侪好回来个对哦?"

母亲答: "弗是。从理论高头讲,是转弗来个。二舅舅是要读大学; 二阿姨声称要照顾外婆: 伊拉纔回得来。70年代末, 为防止社会混乱, 一般知青有大小原因借口个, 侪准许回原籍。但是, 有一种情况是批弗准个, 就是已经当地结婚个说话——除非离脱。

"大张姐姐一去就是十几年,垃当地结了婚,外加养了一对龙凤胎。但伊还是一家头回上海了,讲因为有严重个胃病。"

明显, "大张姐姐"为了回来离婚了。

母亲继续讲: "但可悲个是,伊转来后,原来姐妹两家头个房间侪已住进陌生人。大张姐姐垃张阿姨屋里住了一年多,寻了居委替弗晓得多少干部,侪没结果,最后只好再去黑龙江谋生了。"

我问: "三层楼烟囱像煞吃过炮弹, 哪恁会个? 讲起来淞沪会战打到阿拉屋里来过?"

母亲讲: "淞沪会战地方遠了, 替阿拉浑身弗搭界。讲起箇桩事体, 罪过了。

"小大张姐姐跑脱之后,伊拉两间房间就侪畀政府锁脱空关了。刚没人避个几年,五爱中学个学生子——大张姐姐个学弟学妹——夜到没事体就叫之'消灭资本家余孽,斩草除根!'个口号,用花園里个石头厾玻璃窗。小张姐姐个窗门畀弄得侪是洞,落雨刮风,房间里就水满金山,拿地浪向个木头泡烂脱,水一直从缝缝里漏到一楼。

"张阿姨去寻有关部门,讲要去修,一直没人睬伊。伊讲只要替伊拿锁开出来,伊可以自家出铜钿修。人家干部对伊讲:'侬十几年来,一直是拿白卡借住垃锡庆里个。房子又弗是侬个,侬管卵个闲事?'张阿姨反複解释因为两位张姐姐一定会得转来个,伊求人家讲:'我倪东家留下来两个囡兒。大囡兒去黑龙江劳动,小囡兒跟伊个朋友出去白相。伊拉虽然还没转来,但再多等两年,总归会得转来个。房子坏得迭恁,我要修好之等伊拉转来继续竳。'人家听得莫名其妙。

"再后头,一天半夜,暴雨忽闪。小张姐姐房间个壁炉畀雨水灌满,湿透个烟囱管,赛过避雷针。一声巨响,屋头顶也赛过要穿脱,一米多宽砖头砌个烟囱,应声一断两。妈妈畀吓醒,吵得睏弗着,爬起来去马桶间,就听见张阿姨一家头垃房间里哭!"

味精厂

1993年3月,某个礼拜六,我吉安路小学中浪向放学。垃屋里一直等到夜快头,母亲纔下班,从唐家湾买好小菜转来。伊垃门口汏衣裳,劳括币齐巧垃灶头鿍生火,生之一半。

一行四人,包括年近古稀轮椅浪个男子,四十几岁个妇女,两个十廿岁衣着朴素个男青年,从暗洞埼上来了。两青年扛了轮椅连老人,踏了老旧个木头胡梯,显得分外沉重,臺阶异响弗断。青年想用胡梯两侧个木板借力,咔嚓咔嚓,弗敢再试。

四人到了二楼,中年妇女推之轮椅,对门口两位居民道:"我倪从香港过来。我个爷爷四十几年前是锡庆里个东家。我倪今朝来,是为了瞻仰伊个故居。麻烦,麻烦。"

我问母亲: "阿里个东家?东面有四家?阿里家?"

母亲解释道: "'东家'就是房子主人个意思。"

我又问: "阿里间个主人呢?是万伯伯,还是郑爷叔屋里?"

我瞎缠个辰光, 劳括币炉子也弗生了, 主动要带伊拉兜兜, 抢垃前头拿轮椅望楼高头抬。我跟垃伊拉后头去看闹猛。

到了三层楼,一行人停垃晒臺南首。轮椅老人垃两青年搀扶下底,勉力立起来。伊从晒垃圾个衣裳被头空隙中指指楼底下,预备讲言话。劳括币邪气识相,拿伊晾个物事,弗管干个湿个,统统捏垃一道,地浪向一摆,弗嫌鄙龌龊。视线就清了。

轮椅老人讲: "爸爸当年住进锡庆里,第一日就种白玉兰,就是迭棵。"伊指垃圾个是棚户群中一间撬出来个房子。房子从里向生出棵树,穿出屋头顶,高过房子几倍,枝叶像洋伞介,拿房子侪罩牢之——下底为人居,树上作鸟窠。

伊指垃两间棚棚房子,讲:"此地原先是花房。"又指垃弄堂口过街楼讲:"之前迭埯呒没二楼,一楼是黄包车亭子。"

伊继续讲: "本来晒臺高头只有迭间、迭间替迭间(伊指了指其中几间相对正气个房间),交关宽舒,可以踏脚踏车。

"迭根烟囱管通二楼主人房个壁炉。妈妈生肺结核怕冷,爸爸垃房间 里烧壁炉陪牢伊,一直到妈妈跑脱。"

老人指垃西北面个高房子讲: "天厨味精厂。妈妈老底子顶欢喜替爸爸垃晒臺里伏太阳。伊基本浪每趟侪要骄傲个提起味精厂,伊话: '东洋人统统侪滚蛋,我倪上海人要吃上海滩自家个味精!'"

中年妇女指垃东面遠处带两隻球个高楼. 问老人: "迭个是啥?"

老人弗清爽;劳括币答:"该个是东方明珠电视塔啊。80年代末期以来,上海城市建设日新月异,高楼大厦如雨后春笋般拔地而起。归个东方明珠91年开工,将来会是上海个标志啊。尔笃要感兴趣,我可以带尔笃去参观,呒不问题啊!"——看伊讲言话个腔调,像煞背书一样,弗晓得伊箇个几句是从电视里还是啥地方批发得来个。

一行人又回到二楼,老人向伊后辈逐一介绍了各间房间个历史替庄锡庆个事迹。拉末,伊讲:"哪应该对爸爸哪恁来香港,有所了解。

"民国36年,蒋介石败局已定,坏消息接连传来。爸爸个故友查先生来寻爸爸,伊是上海滩'日月报馆'个老板。伊话伊要去香港避难,建议爸爸跟了伊跑。爸爸话妈妈旧年生毛病,到现在还赠恢復,等伊痊愈之纔好一道去人生地弗熟个户荡闯。

"但,妈妈毛病一直赠好。后首来,三日两头有弗二弗三个人上门寻爸爸晦气。爸爸拿南面客堂间个胡梯拆脱……"

老人讲起各路仇家哪恁来捣蛋,以及庄府入口改造个事体。

老人继续讲: "爸爸一直赠拿外头形势话畀妈妈听,直到妈妈跑脱个一天……

"迭一日天灰蒙蒙个,四周侪是工厂,排出来个废气呛得我都蝴咙冒烟。早浪头,妈妈咳醒了。伊从西面后厢房爬起来,对老早就候垃床边个爸爸话:'我想去晒臺伏太阳。'

"爸爸话:'今朝天气弗好,晒臺风大,侬现在忌吹风,还是覅去了,等侬身体好转,我倪日日可以伏太阳。侬阿要听周璇?我放畀侬听?'

"妈妈话:'我是弗会好了,趁我现在还走得到三层楼,还是让我去看看吧。'

"爸爸话: '弗会个。我昨日之刚刚去寻过臺佛史牧师(D.H. Davis, 1880年始建惠中堂, 1889年开办惠中学塾), 伊话我交关虔诚, 上帝记我功德, 托梦畀伊特为提到侬, 上帝会得差玉皇大帝王母娘娘下凡, 助侬毛病好转个。'

"妈妈话:'晒臺里弗好去,去前头大房间阿好?我也好看看窗外个白玉兰?'

"爸爸话:'兴慈法师(法藏讲寺长老)话过,锡庆里风水弗推板,就是南面迭间弗适合生病人。顶好要搬到西面后厢房,拿腰门关脱,纔弗会受东南瘟星侵扰。'

"妈妈赠听爸爸劝,还是开了房门,话:'腰门弗好开,我到过道里走走总归弗碍事吧?'爸爸也弗忍心揦牢伊。但妈妈一跑出去,还是听出了异样——外头唢呐放肆,锣鼓震天。'啥路道,哪恁垃做啥人个道场啊?'

"腰门开出来。我垃南面主人房个阳臺替丁力对峙。丁力是爸爸个徒弟,五金厂车间主任。伊带了十几个流氓垃楼下头骂山门。两个阿妹 迓垃张阿姨房间里弗敢出来——迭个一切,还是畀妈妈看到了……

"妈妈走到阳臺里,见楼下停了两隻墨墨黑个棺材,当中摆隻花圈, 左右一幅对联:

"'沉痛悼念庄锡庆及其痨病鬼夫人,无情埋葬日本鬼子及其汉奸走狗!'

"丁力看到妈妈出来,话:'师姆娘啊,侬要劝劝哪先生看清形势哦。现在已经建国了,万恶个资本家虽然死有余辜——(丁力指垃爸爸鼻头)尤其有种介资本家还勾结日本鬼子——但组织是宽容个,对

哦? 哪先生上趟拿五金厂交出来,组织上赠待亏哪,还畀哪吃定息。 现在教哪拿锡庆里公私合营,哪恁资本家贪婪个本性又暴露,弗肯配 合了啦?'

"爸爸妈妈一向痛恨东洋人,日军也已经投降之十几年了,迭种无中 生有实在下作。

"爸爸拿妈妈望后厢房拖,妈妈硬劲弗走,跟赛过众牲个丁力论道理。只几句就气得鲜血喷出,爸爸纔拉伊得动。丁力隻出老狞笑道:'哦哟哦哟,侬看,痨病鬼吐血了,痨病鬼吐血了喏。哈哈……'

"妈妈回到房间啥个也赠话,又睏觉了。等伊再醒转来,已经是齐夜快了,爸爸一直赠吃,候垃床边。

"妈妈话: '庆阿哥, 我要再看一趟天厨味精厂。'

"'庆阿哥'是妈妈老底子刚认得爸爸个辰光,对伊个昵称。迭个已经是啥个年代了啊?

"爸爸弗晓得应该哪恁话——楼下头个瘟牲还赠滚蛋——妈妈又话:'风水问题弗影响个,北窗堉看看也可以了。'

"北窗外头,夕阳西垂,天加二灰暗。



"妈妈眼望味精厂话:'庆阿哥,当年我倪刚结婚,是一道眼看了天厨味精厂从平地造起来个啊。十六浦船隻川流不息,霓虹灯照亮夜空,唐家湾小贩日日有新面孔,五金厂蒸蒸日上,侬为工人垃后弄堂造个石库门,人越住越多:上海滩蓬勃发展。埃歇点辰光,天几化个蓝,井水甜味味个,日脚过得鲜得来,赛过佛手牌味精。'

"'日脚过得鲜得来,赛过佛手牌味精。'妈妈又重複了遍。

"话好之,又睏了,然后就再赠醒过来。"

老人讲到此地,停了歇,又继续讲: "妈妈跑脱之后,爸爸就带我来香港了。垃半路,替阿拉同行个王伯伯,畀鲨鱼埃个……埃个……脱了。"

箱中谜

箇一日, 庄锡庆对张阿姨讲: "我今朝发寒热, 竳西面后厢房要睏一整日。我教我兒子陪垃圾就好, 就弗麻烦侬过来了。"

庄锡庆用之大半日功夫,整理出了一叠老照片,拿油布包好。再拿压缩饼干替阿司匹林分了两份。吃之中饭就替庄子睏觉了。

半夜里, 伊爬起来, 拿照片贴身园好, 推醒庄子, 轻声道: "按计划分头行动。"两家头拿好预备个物事, 钱财一眼也弗敢带。

庄锡庆开臺灯写了张条子,拿张阿姨房门掀开条缝。伊盯牢睏着个张阿姨,呆牢了——箇隻面孔也曾年方二八,美艳动人啊。11岁个小张也垃伊眠床浪,抱牢伊酣睡。小姑娘头发垃黑暗中都看得见光泽,眼插毛又长又密,面孔粉笃笃。

啥人甘愿拿自家屋里个人,连同箇笔辛苦打拼得来个财富厾脱啊?

庄锡庆望垃圾,心里垃煎熬: "我要弗要拿伊叫醒一道跑?留伊下来,我放弗落心;带了伊走,路高头凶险重重,我两个囡兒明显过弗去,又离弗开伊。伊拉弗跑,倒作兴一眼呒啥呢?我是资本家,伊拉又弗是。"

另外一头, 庄子从主人房个玻璃窗望楼下扫了遍, 再到弄堂口胀了胀。回转来通报没异常, 催伊抓紧。

庄锡庆拿纸条夹了门缝缝,门虚掩之。两个人灯也弗敢开,摸之黑, 迓出自家个屋里。

过脱一歇歇,一阵风吹过,门"嘎嘎",开大了眼,纸头phia,落了地浪。张阿姨睏梦头一惊,爬起之看到纸条,已预感弗妙。工整个字迹道:

小莉:

有侬相伴廿三年来,我十分甜蜜幸福,却赠待侬哪恁好过。乃终大难临头,还要再来托侬,实在意弗过。

我走个迭块,前路茫茫,吉凶未卜。奈何留下之两个囡兒,年幼无依,望侬肯管教伊拉。尤其是小囡兒,伊天性纯良,弗识人心险恶——我间主人房,请侬让畀伊竳,教伊少吃眼苦头;西面前头间,予我大囡兒。我其他一切财产,侬可以自由处置。

我庄某人虽弗是慈善家,但自问办事待人无愧于心,却何故天地难容? 遠走他乡,或有出路。愿锡庆里此后太太平平,哪一家三口,安居其中,好永享天伦之乐。

珍重,勿念庆

轮椅上个老人道: "爸爸经常话: '我对哪妈妈替张阿姨两家头——我是有事体对弗起哪妈妈; 但我一生一世顶顶亏欠个, 还是哪张阿姨啊。'

"爸爸畀我一隻箱子,吩咐我决计弗可以拆开来看,只话里向有封信。将来万幸可以回转上海滩,碰着之张阿姨,弗管伊有啥变化,一定要拿箱子交到伊手。万一……"

老人对劳括币描述了张阿姨个特征, 随即问起了伊个情况。

劳括币道: "归个老太婆一直一个子过日脚,大前年俚总算死脱……去世哉。"

老人讲: "爸爸话, 否则就交到我两个阿妹手里。"

中年妇女就向劳括币打听"两张"个下落,得到了伊拉个坏消息。

老人讲: "爸爸又话,假使侪交弗到,就拿箱子烧脱,也算是对伊个交待。"

劳括币道: "弗能烧, 弗能烧。倪房子是木头做个, 烧了要着火。倪 呒不地方住, 乃哪恁弄法?" 中年妇女谢过劳括币预备离开,劳括币道:"谢末弗必谢,但是僚看,我陪了尔笃介许多辰光,呒不功劳也有苦劳吧?阿有两钿畀我零用?"

中年妇女头也弗敢抬,推了轮椅转身就跑,两个青年后头跟垃圾。走出几步,其中一个青年回转来,袋袋里挖出一把角子,边拣边数,畀了劳括币几钿。

老旧个胡梯仿佛唉叹个二胡, 一行人下楼了。

大事记

1903年: 唐家湾水边设摊; 庄锡庆出生

1904年: 庄妻出生

1908年: 唐家湾填河修路, 小菜场渐具规模

1917年: 张阿姨出生

1922年:锡庆里建成

1923年: 天厨味精厂迁至顺昌路330号

1924年: 庄子出生

1929年: 佛手牌味精冲出上海, 驰名世界, 天厨味精厂厂房连年扩建

1933年: 张阿姨入庄家

1941年:太平洋战争爆发,庄府正门第一次改造

1943年: 长女(大张)出生

1945年: 日军投降, 庄府正门修復

1945年:幼女(小张)出生

1946年: 庄妻患病

1947年: 日月报馆查先生南渡

1954年:《公私合营暂行条例》通过,庄府正门第二次改造

1956年: 庄妻病故, 庄锡庆携子逃亡

1958年:第一家房客入住

1960年: 小张失联

1961年: 大张下乡

1966年: 文革开始

1968年: 庄府遭雷击, 烟囱损坏

1974年:大张离婚回沪

1975年:大张再赴黑龙江谋生

1990年: 张阿姨孤独中去世

1993年: 庄子遵父遗命至故居寻访张阿姨

2017年: 唐家湾小菜场停业待拆

2019年:原天厨味精厂厂房(已被列入4422处不可移动文物)于争议

中拆毁

2022年: 锡庆里拆迁, 百余户移居; 经黄浦区区政府评估批准, 老树

白玉兰被砍倒

自此, 庄家往事, 随锡庆里一道, 灰飞烟灭了。